

見素林公文集

書



見素集卷之二十三

後學黃佐校正  
孫男及祖重梓

書

復潘孔修

得書始聞太夫人之訃居鄉坐井誠是也悲戀之餘緬想  
孝忱畏仰畏仰計時已喪事苦塊割裂當過毀自裁執事  
有宗祊之責也某近幸得請食雞棄肋已決昔年而生龜  
脫筒始諧初志酬元亮之樂而未已希文之心道然也香  
數炷致勤靈下不宣



復蔡介夫

承致先大夫祭文且讀且泣腸裂心刺而魂喪以飛謹以  
宣之靈筵存沒悲感過甫值執役荒塚又殞落之時言說  
不敢自將諒悉是狀也晚節此退大是明白請同辦居鄉  
道理以畢餘年曉夕祝老天祚宋而已不具

寄陳東所

柴桑諧往方幸接農談侶漁話與風煙猿鳥爲徒而宿疾  
載嬰隱憂時作嗣是有先君子之喪天禍不相貸如此讀  
禮孤廬紙筆無味雲鴻便否無從知若自棄外罪愧罪愧  
承寵高文伏讀增愧求副之勤雖老猶有餘念焉不具

與荅書

厚惠教言盈紙疇昔捧讀悲感直房春餅轉瞬二十有七  
年衰容敗質復見不能無故我之疑握手出涕頽然復笑  
以倒也元樞大拜天下固將以君實伯起望公夫用特異  
者望特異宗社華夷將寄命于公天下士民將陰受其賜  
者欽賀欽賀某晚年諸疾盡指不能數先生知我獨不爲  
謀一骸骨地耶賊想旦夕平有此賊有此兵陝便不如若  
閩浙人齏粉矣斯亦謀國至幸不具

性甚怕冷又甚怕熱醫書謂之元氣不足兩年來尤苦夏  
月日午一衫不能容湏靜坐室中或荔陰之下此豈施之



臨人涉秋即重綿冬則敝裘大布至重不可舉南方如是  
北方又何如且賤性直突易觸禍故自四十五時已決歸  
非獨今老病時也聞有生擒不宜斬之議夔保尚請兵自  
衛通巴諸城躍足可進趨之可倒也八萬之賊屯隔一程  
寅策馬而已已至監禁則誨盜解之會城水行兩月餘陸  
行十七八日兵辦賊猶乏里甲邑若空生野且不可仗解  
何人僻處山縣押又何官深林險箐一雨則溪高數丈候  
守數日不可濟防又何術且四處從賊如歸自是而賊氣  
沮賊從散下著者心困苦也就中率多曲容某平生有薄  
事耶撫尋遂而雨久溪漲賊不得如期疑阻中變豈天固  
不欲容之耶大挫之後而又撫之謂罪固當誅殺非吾願  
仁無不愛生誠吾心賊曰吾罪已深加之劫縣無望生理  
然藍五時以不聽撫怨群輩曰林豈謊我輩的人今都應  
他話再何處朶渠亦自公論也

荅西涯翁

得報知又乞休又未蒙允元樞大老宗社生靈士夫一大  
命脉也容舍哉椒寢方馨前星立耀然范景仁婁寅亮之  
所謂大慮大計慰祖宗之靈以係屬華夷之心者似或一  
道某俗樊再入以膠局絕通透之人而當此紛結不可解  
之任覆餗泛駕其所也兩川題目想成文安寧左牧副憲



盤糧無數題目皆復出效平生不識避事亦不識薄待人亦不敢私作事天上落來之禍無亦自有數耶辭疏未知得旨否實病不堪非敢激也詩話捧讀數遍愈愧某體裁痴重嘗和曹廷輝詩托鄭憲副岳轉寄復書曰四夫擡去莫知所指一日來南畿問之曰非四夫安得動乃知詩重也然亦有天趣自然處題漁者曰地幽拙言詞頭白猥生理獨樹風正涼月出大溪水題海風觀曰星影倒隨天下上海波橫打岸沉浮夢中贈東山曰心折正如東下水書成難寄北歸鴻感事曰無多酌我防昏醉不可干人且靜眠星銅澁鐵不及時與化治中孤此一生九死餘恨也達

子稍能作老成語詩書篆亦稍知方但性懶莆大官子多無福不知可濫一錄拜老師祖竊波餘否也不具

日隱然泰和渾噩氣象自古謀國不動聲色而運用天下敦尚博大崇獎廉退開廣忠益省刑薄歛以務悅人心使天下後世陰受其福國是定國勢尊士習正民風淳夷狄歛衽而不敢南牧公負竒材膺顯際伯紀入來方成朝廷者如此適見黜落之報途中所見不稱人意者多在網中何神也邃庵之起甚愜成大事湏此老某只箇拘局硬擔事任怨的人儲靜夫邵國賢朱懋恭孫志同皆可儲邵體弱只署南部以鎮浮華國爲宜終養御史陳茂烈曾奉薦



身集卷之三十三  
書  
四  
本郡學官近固無例然天下恐無第二此端亮清苦人然  
必仍舊官則巡按二司易相處今人自俗也兩川流賊甚  
苦移兵轉漕勢如旋磨隘可把而墜崖攀木猿聯而魚貫  
者不可防非若攻城拔寨有常處也荒陬僻邑居然生苗  
駢遣無一中節八日漕程月餘不應餉將盡如之何哉是  
後也知府張敏何珊數十鬪追之陝兩月餘未還叅政曹  
祥僉事李恕策應亦之陝去冬及春及今皆有奇績某平  
生不知兵諸賢將士力也風足日甚痰嗽久不愈遂歸存  
沒受德不具

西征每以不足副諉受爲惧近想可畢事君相指縱之神  
爲藉手東歸之地者也受知川嶽乏報涓埃心者盡而力  
者不可以強支縱有差除奚福消受乞歸誠本懷煩決裁  
處使不爲再乞觸禍則所以惠我而處我者至矣歸後義  
難奉書惟周悉調護拔真才紓急政奠國是以迂續繁祉  
以垂有未望至幸

謝方石一代人豪與王介庵翁並峙南北記王司馬不乞  
遺恩介庵爲之請夫錄死所以勵生方希濶之舉尤歆動  
之機某素慕此老然無一面非先容也詿誤落官尚有人  
川雲巡撫似不可缺兵備亦須有從容圖之

荅黃伯固



衰力無所用跡孤簡與然而平生嚮往名先輩與夫海內  
來進之士固有不交一臂通一問而自謂知己者數年來  
得聞吾子私幸吾道不孤鄉一脉有所承受慰喜愧懼往  
來于懷也過京山繼聞禔身臨人大致重以慰以喜愧而  
無懼也方得書若文而三讀之以慰以喜鄉固奇士果可  
以無懼無疑也第所屬意不如我之不孤重加愧焉兩川  
未盡平旁郡諸邊盜戢戢然起袖手臨局憂懼轉深適幸  
有所聞爲宗社生靈大賀否獨蜀不可爲蜀哉不具

與林泉山家宰

匆匆爲別豈勝馳戀蒼松古柏孤特之操愈見之膠冰墮

雪之間非若望秋蒲柳然深爲世道靈光獨幸公不得不  
爲姻舊私憐也賊臣幸敗觀世者尚深憂諒是懷也川賊  
多不可言盡掣漢兵調土兵制之幸且盡乞本與捷本偕  
上得允榕城當留三日爲相樂丘秬蠟房一味相處也利  
瞻弟今始敢爲謀居官惟清約畏謹而心主愛人嚴涖之  
川賊撫竟不終然每仇其黨欲犯開寧其首以不可負恩  
責其下固賊心者况人乎薄與奢均不可通亦誤人但某  
過於獨溫潤縝密尊翁自弘壁容燕石求耶不具

寄楊石齋

藍駟逋誅曹兇突作在彼固難制在此兇橫幾若無前元



日親征是可知心緒矣方兵屯合山懼覘我江津之脆徑  
擣吾虛駐蹕溪以扼卒潰出城之路小僕請由舟笑曰不  
濟死所耳僕驚夜病賊果出吾計賴此先發何家老營之  
焚奚異秦坑之慘然鄰封遠聚効尤而旁睥者幸此大創  
也茲趨保順辦監天幸畢事如江津則納節東下乞歸初  
念與是出本懷須此以杜竊鈇之議六十病夫榮槿亦自  
有限恨到川不得一拜尊府老閣下先生床下紆通家宿  
好亦缺陷世界也惟自玉運幹元化至祝

慰西涯翁

隱聞令愛孔氏妹夫人謝世天地間之福不欲天地間之

人得全我先生純德具美固造化所宜曲右者孔之賢淑  
不宜是以天然父元臣子復爲元臣婦世未有平滿若彼  
者付之無論也先生文章正傳道通塞世興衰運祚修促  
身任之固不得不自擔荷而自諉者不得不自愛也曹寇  
自稱曹王出世僭名號鋒銳不可當遠近俱震幸此大捷  
本具繼多就擒首漏僅方四亦躡其跡追擒之矣藍再辦  
則捷與乞本偕比某解而東病誠多且久官非久閒意受  
賞非再出意也劉謝似宜亟處以言落官者亦似宜復惟  
照在是幸

答黃伯固



辱和二詩格律思致甚善何幸鄉國後賢吾友也區區材  
 識枯滯百凡費力久不能逮人執事一擲足便到固不可  
 不自寶惜也二疏觸犯忌諱思過無已有其心而無其識  
 碎首甘心然有自銜之疑宜不若是甚也作文專看秦漢  
 以上猶有宋人語當覺其然聞彭大治世契甚讀書提學  
 正大人宜是子不具

賀楊石齋

承致會錄人至寅詢仙郎茂應狀頭之選德門盛事僅見  
 之今而亦未前聞之古也楊世有盛者關西四世宰相四  
 明兄弟三尚書建州孫子連第然未有萃一時如此者可

尚也可賀也亦可畏也宋養士不負大科惟王魯宋庠馮  
 京三人父子宰相僅呂許公韓魏公今所望于狀元者固  
 不止于是斯通家之好愛德之私也痴突與時齟齬荷極  
 力營救生死肉骨其惡敢忘然終惠于某者一放歸足矣  
 能一一曲庇之耶兩川是役非老僊所宜勢固衰止然亦  
 鬼方之伐也人便謹奉空槭為賀不具

寄孫司徒

南畿時曾附數簡想達矣天佑我明逆賊受首黨人敝  
 政釐革而斥逐以盡執事邃庵柴墟二泉東川並以起群  
 賢滿朝盛矣哉前輩謂不務逐熙豐之舊人而務革熙



豐之舊政激有後日紛紛之禍今宜無此也然士行如鬼  
使人厭惡不知自何時敗壞至此固宜究心也蜀如潰隄  
不可填塞人心者固去也而調運頻復重以祛之憂如焚  
惓而平生精力已盡宰物者胡困我遲暮之歲如此也藍  
駟勢已衰撫若可成則骸骨有地執事謂某有快活福否  
也日曷之離有明戒焉柴墟二泉恐未至不作書會中幸  
出不具

寄遂庵

承佳章累紙若謂其稍就清脫者庸知川如崩瀾層疊湧  
出使人駭心喪魂撐拄不暇懸命艱兇至不可排遣長嘯  
大哭重慶再入父老環觀爲我哽咽江津與賊隔江而哺  
旣入空城烟火俱廢盡日無一水一米入口方幸踰萬大  
捷容知川北又有馮憲副傑遇賊之事蓋前哨已勝而馮  
截其歸路正犯窮寇之追之條然志可嘉也苦命值此何  
計得謝楊總戎輩流表頗爲異好生議恐欲知

寄石齋

人田傳尊諭責過無書不勝驚悸平生踈懶涯翁僅荅一  
書厚翁同年取厚亦不通一書惟蜀以故里故諒屬留念  
不揣數書私懼過瀆而猶若爲簡公之繫戀鄉邦故人者  
如是天下可知矣賢相古有是耶某猶若形迹自拘過矣



身素集卷之三十三  
過矣迂腐非撥亂才三川麻沸左提右挈營救日不暇夜  
不交一睫者時數月方賊烏合二萬餘剽悍尤甚遠近搖  
扇仗賴君相發縱之力擒斬萬餘群類散者禁追捕僅購  
其首數人與聚而逸而未散似有可得之機第麻六兒奔  
陝又盛川兵過陝攻之又奔川馮憲副傑孤兵遇之被害  
戎事垂成值此奈何每觸事仰天長吁繼之以泣邊糧近  
有全徵之議訴者紛然父老言重慶毛知府嘗有是徵幾  
激變固全盛時也今日尤屬可念公鄉人容不爲之所耶  
某精神愈衰備堦生入門是外百無所圖公知己最舊容  
不爲其所耶乞本瀕封又沮馮故也照原萬萬

復孫九峰司徒

承書具審道况休裕慰慰蜀如漏船補塞不暇造物者胡  
貽我衰謝之年之苦如此也先是尚未敢殺官自輕淺舉  
事是風遂長繼窮寇加狠又有任其責者不得歸苦苦涯  
翁出處嘗私論之司馬公之出國家甚幸在公獨無幸也  
今人責人過詳不爲國家謀其遠且大坐鎮雅俗與翁翁  
集事績用自殊記弘治間有論王介翁不任上宰某曰代  
者誰其人語塞涯翁去固宜且晚抑代之必過之今似之  
者誰歟則固未宜遂其私者承論敢對其亦謂然以否不  
宣



復劉文煥

遠辱大製獎詡過情執事亭亭然物表入眉睫誠難者顧獨誤在愛中儼以非分陸范薛李古今幾人哉不敢當不敢當危機距脫自信輕便然面望未嘗收涕賊中動靜幸時一附報欲釋自慚尤欲爲蜀人先賀也士風大壞監巡藩臬間亦失素守郡而下僅百一強人意甚之大非人情民安得不窮且盜執事冰清山立運用更化無難者近時趨奉過禮迎送至出界地甚費且擾夫簡則肅肅則嚴沈思古一大人物恐欲知餘惟古道自重不具

復楊志仁

承致尊甫文懿公詩集并教言皆山中渴欲得者感惻何如中丞榮轉吾道私幸然執事資望已二十年前故物人固左之天固右而畀之文懿公宦迹同也而亟欲求去門第誠過盛抑直道有難合者其然耶記同曹僅吾二人家居亦少歲月可久借耶第事會一日盡一日報荅涉齟齬則行意水石之間料理末一着局面區區質孱病早近尤不可支無出期矣書例不荅在執事未由自己也惟爲道保愛萬萬

復段僉憲

榕城瞻拜承欵顧勤復按部又辱光臨斯文情義加焉受



賞致賀似於名義未安蓋無可賞亦無可受而誤恩再辱  
顏汗登拜豈容謬沾賢者之惠哉且公私賀儀一例辭却  
吾執事廉白自守美官二十餘年未營一第家食不自謀  
自我稿若奚足爲區區潤哉領厚情還厚幣心甚安之照  
在萬萬

慰楊月湖

某啓林居荒僻執事聲迹久不聞嚮徃意加焉前數日會  
汝華于建陽始知執事有尊大夫之喪柴瘠之甚噫此吾  
二人共遭也何夕何事亦何忍言哉執事爲道之身萬以  
禮無毀某是日擇吉是日有金革之起義不敢辭而壯歸  
晚出其心果欲其志果可行耶行止一事便自不可謀禍  
謂可免耶是由天落也已具疏另選精力預處地方容令  
照舊致仕不知遂否便中無惜惠教小奠附致几筵無任  
悲梗不具

寄邵二泉

恭聞起落朝論固自在然所以處先生者豈星凰欲與遐  
荒一覩尋收而入之耶藍賊且盡曹已收戎旅凡勞視徃  
日江之西十倍日懸命鋒刃間閒福無力銷受險難有此  
其如何歸山再請未遂適觸罪自實倘荷放廢則蘭陂雲  
水又自故物恨二泉柴墟無一篝燈交臂時也不具



答張白齋郡伯

適枉郡駕暨二庠博士傳姚英之之檄請先祖都憲敬齋公神主祀鄉賢豈勝感幸先祖孝節廉重當在古人中教於鄉門下有尹上宰諸人教於官門下有高司徒諸人在蘄有生祠當道欲借邑令起之風憲力辭謝方薦提學以母老三䟽乞歸時望六時也岳蒙泉憫其貧惠之地頗居厚利峻却又強又連却周以棺具酬之直皆人所難者故沒時蒙泉祭之文謂未老即歸事育罔遂徵此知學優游即樂盖心知語也然鄉賢有艾軒復齋夾漈諸老進與同列恐非地下之願矧生時嘗未滿猶人者必不欲自混某

至愚極陋亦欲成先祖之美胡希仁程獻之王存敬累有舉皆辭義不敢今日受命吾人舉事名教所關亦使鄉之爲人子孫者不輕進其父祖以襲頽俗爲世告耳尚容親謝不具

達孫大叅

歲頗不收糧早賜明檄速以時輸少遲則盡于私食雖百痛之無能爲美軍食何計哉數時穀價一兩無三石後可知矣濱海已三不熟民不聊生或生他患意謀之巡按公早委推官清理其地之尤貧者二月間將預備穀一兩四石五斗之價賣之人僅五錢毋容多買得過者冒買一石



見書集卷之三十三  
罰十石主買擇義民大戶有行檢者具名于官人主二百石價令自收穀同看倉稱發至成熟或依數或大熟作四担八斗買穀還官庶無吏隸之擾無妄冒之奸而窮民得受實惠此非林下宜聞者然人心洶洶亦不容不慮也漳泉或有賑濟亦先移文以安其心蓋岌岌矣不具  
寄元老楊石齋

大號渙頒宿弊盡汰天生

聖君天留

賢相周宣之

王化復行山甫之保躬補闕殆軼而過殷武丁傳說亦有不足爲者矣某待盡陳人起落之盛豈不欲効侯鳴以裨新政然諸老則可某則不可人之飲水冷煖固自知也某

跡孤取忌去朝廷三十有八年年四十五長謝矣賴

君相哀憐言官論列五叨

召命受者再大義所迫非

得已也而力短弗効委心就閒又十年于茲矣齒脫形羸風濕爲梗精神恍惚步履蹒跚語言顛錯何以拜舞闕廷叅國是追吏議逃人責者哉抑固自處何如温公病猶留潞公老猶出崔清獻則循分力辭爲報某固願學也七千里外再乞實難老馬哀鳴一思皮骨之所非先生誰耶伏惟  
垂憐毋致再乞萬萬

寄蔣敬所閣老

邇者伏讀

新詔及日報事目奉

天之詔書開元



之雜報退然其後矣日

御經筵閱章疏坐三公以決

政事侍午食則虞周之盛千載一時也惟賈生堂陛之論似或未講 聖固生知亦必待學意未有告也抑蠱與

革與夬皆致慎重之詞亦宜念也侍 蹕憂憤林野淒

酸二詩備野史何時也今又何日也我 天地 祖

宗固相之矣某自戊戌獲接道容貯結有今時以不及話

心悽領教言為恨然在匏庵木齋守溪諸老亦僅一面書

去位始荅方石東所吳東湖無一面而詩篇往還地似也

謬承起落義當趨赴第已七十致仕之年衰謝轉深行能

素薄何恃能起昔君實起景仁不起東湖九峰幸庵固君

實者某無景仁之望而年過之容不知自處耶幸遂私乞

立足素定再近矯三近瀆 執事恐使其矯且瀆我亦勝

至祝餘惟為 國加愛不具 元老毛先生闕幸瞻仰不

顛書幸道私臆

寄孫九峰

丘壑隱憂彼此如積不謂復際泰平今日也起落意外無

任覲顏 執事純德遠猷綴臯夔以彌成熙皞衆心共屬

幸毋讓焉某內乏素抱外乏時宜既老既病班行無其跡

者幾四十年今七十致仕待盡期矣朝無年似之人無同

時之舊至諸老亦無一識而禮儀久忘政理亦踈何恃能



起且壯歸老出亦悖甚矣某豈忍負 聖明之主以自  
安箕穎者流 執事白巖幸庵諸老自足任世道之重某  
亦擇所自處以少裨難進之風均爲報爾幸 惠曲成萬  
祝萬祝嘉靖 新詔遠過奉天而新政弛張開元分當  
北面天生 聖君而輔以賢相復舊爲新化否而泰生  
枯活涸霖雨八荒焉然易蠱與革皆有深戒謙吉無不利  
賈生堂陛之論亦關大禮此 執事之素懷亦密勿大老  
之所屬意也不具

寄陳原習侍御

邇得廉古之望于吳清澹老格于滇序侍養錄于二泉記

生祠碑于小泉豫章鑊鄒擁腫鉛鈍其不同器也祠甚無  
謂在滇時且碑亟沮之不知何時又祠也讀高文重慚作  
焉然亦見道味之似與淺而知深也嘉靖新政 聖固  
天生然量用年進當受言之際毋亢取忤煩取厭高取悻  
驟取輕急於求治老成弗爲信而後諫古有成論焉幸擇  
所必可行言之舉大遺細毋用數數也 執事養深而望  
久自愛自愛克之幸同是祝諸老起落九峰白巖之渾謹  
幸庵之勁力宜也區區衰且病又值當謝之歲義當力辭  
守溪翁不知何爲處不具

寄白巖



山中伏觀  
 新天子文武神聖釐革之盛殷高之四海  
 仰德周宣之王化復行下風矣考遺起落蓋已傷力過時  
 之馬矣自忤柄豎朝無其迹者幾四十年在林下幾三十  
 年五  
 召二起在官僅四年而半及是始被遇而病以  
 老矣  
 執事九峰幸庵梧山臺閣諸大老自足以佐理堯  
 舜其聽散野箕穎者流不謂無報也且班行無年似之人  
 無同輩之老年已當謝病又龍鍾拜跪俱難語言轉忘再  
 乞回往動踰半年司空地重容延緩至此耶連䟽以進亦  
 事  
 君父一真幸裁可否九峰幸轉道決不能起意  
 詔條群弊盡革士風亦須一還今服用之侈威福之過送

迎之盛巡守不時歷諸司不治事官習於邪吏肆其奸學  
 校廉耻道喪雜流朋黨風興不副人意其不盡指也夫有  
 德義以正其身禮法以正其俗我者皆正則群小自帖是  
 謂不威之威其不然燎原之星灰固在也世道之責非  
 執事諸大老誰耶不具

復趙司空

久悉  
 素望自端簡公所一臂未由豈勝注嚮適承教札  
 公移誤服  
 聖天子新命  
 勅促上道叩頓忤惶不  
 謂榆景值茲竒遇也無司馬之經綸有司馬之老病年已  
 七十自  
 石老外無一二相識而骨枯神短血竭事忘跪



拜時不能起且初心日負聰明不及又去京師幾四十年  
朝儀久踈袍服冠履亦盡破缺又作一番出處人其謂何  
當今耆碩滿朝某一人足重輕耶即舉訓工而論某素乏  
心計少識事而食官皆巧險者流以不識事臨巧險者流  
弊何能汰財何能節功何能成三疏擬辭悵祈得 請  
恭惟 執事望實素隆事體練習正副是位東湖再得共  
政起部當立改觀此固 朝論之公亦區區以人事君素  
負也由衷之言 伏期 鑒亮

寄陽明

適聞

召命壯上

天子仁聖群賢和會諸老之弼

亮不孤泰平召致今日矣惟 白巖未至舊都猶居洛也  
綱紀之地治體風化所關略細瑕崇大體第一義也言路  
開矣高取難煩取厭則開者恐塞幸門塞矣短取媒隙取  
伺則塞者且開今日可幸也亦可慮也然此時士風亦須  
一還服用之侈威福之過送迎之盛巡守不時歷諸司不  
治事官習於邪吏肆其奸學校庶耻道喪雜流朋黨風興  
不副人意其不盡指也夫有德義以正其身禮義以正其  
俗我者皆正則群小自帖是謂不威之威世道之責非  
執事諸老誰耶不具

復陽明



辱書惠兼承趨 召之教 聖明在位可謂千載一

時矣綴臯夔以贊唐虞之治少知用世者身先之某敢後

乎哉桑榆景暮班行無更七十之老石老一二外無更相

識之人精力久衰經濟素乏何以副 上知塞人責哉

鄉康懿公六十九翁司徒公六十八某徑速其歸在惠安

公六十四時也盡人固盡已哉近傳 執事以左轄召虛

殊爵以須後封高奇之績乃今顯白載 詔書播華夷

而傳之來世掀揭柄人何在哉公固天所與也幸顯其行

副 側席治道至意其大義當決辭三疏錄伯前數日

有書想未由杭致也不具

寄章楓山大老

嚮次曹定翁二詩奉憶計徹 尊覽是後德音時聞筆札

欠便八旬舉丈夫子固天相也茲復重荷 明聖新天

子錫爵存問之典異是遭哉某亦混起落君臣之義無所

逃天地之間然七十之年精力衰憊病以老矣已三疏祈

哀諒在 垂憐陸汝亨已承卹典快幸快幸唐侍御久聞

風采近見旌忠數篇大是名作二賢諒出門下也莆後輩

亦頗興發林茂達黃輦尤者小帕將勤輕褻輕褻餘惟若

時眠食以膺純嘏至祝

答周克之



承書价感感區區龕戇徒以犬馬之齒誤為

聖明新

天子垂錄三使臨門非舊時老馬筋力矣擬扶疾登道面

覲 龍顏使老狀衰容莫逃洞察乃堅請不受仕而還

上也必不能到亦中途辭乞次也不意到劔而痰喘作至

建尤甚衰削已非人形今雖略愈過山筋力猶未敢擔當

也然未出境而乞殊非大臣赴 召之體天則限之為

之何哉俟數日更量進止人回謹此申復不具

寄彭幸庵孫九峰

某狷狹不善諧世謬意高逸者流四十五而孤翔 五

召而載以起亦尋以寂矣不謂又叨 諸老之 召夫以

壯之如彼衰之如此奚取自副慚忤有加焉三使敦迫強

勉出門意面覲 天顏盡見某之衰容老狀然後悵䟽

祈哀不受官而退不謂到劔溪而痰喘作到建溪又作卧

床褥者半月瘦削重若可念祗今未敢過山京師又未知

可到否也 新天子聰睿神聖舜禹之君惟 興議一

事似若未嫌某在遠微聞輔臣禮官言官執議甚正然猶

未能一去俗格出濮議之上若定陶共皇則最下之議吾

人引 君舍舜禹奚法哉舜受堯也曰受命文祖文堯

始祖廟也禹受舜也曰受命神宗神堯堯廟也禮曰有虞禘

黃帝而郊嚳祖顓頊而宗堯名雖曰禘而人後之意隱然



其間當時大事皆記之矣獨不聞有尊其所生之父之事此萬世法也今不引舜禹之典章而下襲漢哀之邪議其不惜哉 執事九峰 上所起若猶未舉須共一疏使

輔臣禮官文字之臣再議其間名分所關非細故也夫名正則言順若曰如定陶共皇稱 與獻帝則興王國也

安有帝其不可一也若曰如去定陶稱 獻帝則

七廟之中似無小宗稱帝合大宗之位其不可二也

獻王義不可一日不立後以王嗣帝其尤不可三也由是

而推無往不悖蓋大綱不正則萬目不張亦勢然也或疑

有難處者其惟有不可易之大禮有不能已之至情情不

足勝禮也舊矣大孝召大慈大慈亦成大孝 聖母純

懿之德中外具聞決不欲崇 獻王以虛分以上累

聖朝大禮貽 聖主大全中之一闕為天下後世議也

或曰事既舉如何曰聖人不貴改過一執不忍而終身執

之乎舜樂取諸人為善禹聞善言則起拜 聖主舜也

禹也中外人心共屬 聖主如舜也禹也何難改之有

甚至未可期而議禮決不可緩幸二公圖之病中言不能

既亦不顯作書 內閣上宰宗伯諸大老先生幸出此書

道下臆不具

寄陽明



見素集卷之三十三  
書  
三  
執事道足濟美學足開來文足追古人忠足以落奸賊擒  
叛王又得 聖明新天子爲之伸雪以大取封拜試思  
之古今有是耶下風謹低拜矣區區老以病道建溪痰嗽  
二十餘日形體爲之瘦盡過江尚有辭疏道此不一會不  
拜尊翁老先生床下何心幸諒幸諒蔡我齋又過家故性  
猶在也一笑

寄胡少宰

久不會謬記所物色 執事李嘉魚二公俱偉 執事尤  
忠鯁可念 新天子虛席治道拔寘天曹以 尊甫老  
先生計奔歸是豈一私焉之情已哉然大歸是時目可長

瞋 執事亦可少節哀悃爲來日報谷地也賢者生世繫  
其不少香幣少將 几筵病不入城不親吊慰缺事缺事  
照亮照亮

寄李宮保

白茅之役初聞亦異既乃知利人甚慰慰李貞伯少卿物  
品時出伯綱吾輩諸人之上吳文定公不能過也鄉賢未  
入子孫之微爾矣可觀世矣文徵明奔父喪卻賻金幾千  
許寧庶人屢召不起氣節有如此者其溫粹之養介特之  
行深博之學精妙之筆法皆眼中所少一書生名動天下  
蘓人以其爲星鳳意當以潘南屏例薦之昨會守溪翁謂尚



過南屏致之舟上與語連日知之深且已見其喜氣克溢鄉會恐不能易亦無待薦然吾人道不當遺此賢者也不具

寄楊石齋

伏讀 新詔及封還數事心降氣屈甚矣先生養之克而任之重也泰山喬嶽與雷霆而出雲雨長育群物成能造化為海宇巨觀足矣某朴璞同價且愧且忤扶衰強起不謂年高分薄至建溪而痰火大作醫藥念餘日稍愈忍疾過山至衢又作隨處問醫至蘓常尚未脫體坐若夢行若什居常自意有其心無其遇今有其遇又無其力矣非

天耶再強而前恐湏竟乞非甘自棄外有托而逃者矣本至幸垂憐燭還之間散士各有志仕與處亦道也餘惟終始弼亮為 九重倚毗為 九廟光重不具

答后峰

家與途三得書謝恩議禮二疏明白正大忠愛襲人近鄉諸賢皆卓卓自立山川鍾靈氣義歆發 執事立赤熾不誣也慰慰名大爭亦大幸重自愛立純大之體非大事姑付言官言之文材啓範二賢學問突進可喜可愕區區甚苦是出建溪一病至今未全脫體乞本已辦俟進鄉某某某煩道臆不顯書



寄邵二泉

昨承道寄意盛僕云 執事大賢慮周而謀遠自有殊見  
 天地祖宗所以祚有道者自有殊徵也然邃庵後承家承  
 休也未四十承家後冠也亦未四十以彼喻此若後焉意  
 擇一親者賢者鞠之俟掌珠呈瑞一則瓜分之再則鼎立  
 之無過也 執事道深德厚名重位尊海內士道義相忘  
 兄弟相念如區區者恐不再數不告誰告哉藏修之所力  
 頗不辦神用涉過勞訓儉亦非所事愛深言易罪過罪過  
 舟孟瀆候風九日晚始到明發議禮䟽行度垣行又明日  
 矣乞䟽候前再發謹此奉報不具

寄蔣閣老

某搪突狷急自讀書謬意古人自效當世不善諧俗雲庄  
 待盡二十有七年蜀之歸亦十一年矣又作一番行止以  
 術則踈力則衰以病豈不欲少依光華聽指令門下者哉  
 勢不可也謹䟽情懷伏祈照亮使骸骨故鄉至感至感三  
 老先生恐瀆不顯書

寄楊石齋

某晚暮行止奉累祗見陳瀆 真主希世之遇閣下忠  
 誠許國三老同心輔政亦希世之逢某雖駑豈靳為役衰  
 病誠不能也初期面覲 天顏三䟽辭職不謂又有刑



部之改某又焉有官之擇哉刻日且至京師不一見  
 新天子暨我閣下君臣大義固缺而友朋之情義亦踈某  
 之罪何贖哉第恐至不得辭而官不及効好事者又有某  
 辭某受之議悔將何及吾人出處寧近迂苟且某即  
 就職能時月留耶親賢一疏倘 聖衷開悟治化一機  
 某在職報答無出此者不揆為諸君子開端而某之得解  
 亦士風一繫也 敬所 礪庵 湖東三老先生奉同  
 裁覽不具

答趙司空

近閱報脩城數處皆人國遠猷老成謀事自異某寧有此  
 耶方幸即不得乞附麻倚玉因焉不意又有它改一生刑  
 官最後有兵柄之委恐恐然作過後昆而避神入廟重可  
 慨也又不知遂乞乎否苦事苦事是位想暫屈者賢固大  
 有所授也不具

復顏司空

承書并致价感感某無惠荷 新天子誤知然壯而歸  
 老過而出既久墮於蟲戶又難脫於龜筮重有是改非分  
 之愧擇官之嫌蓋兩具焉世常言刑官作子孫累是謂畏  
 影而走日中者也然抑末矣本之則老以病服列以共所  
 事期無刑副上知誠不能矣再疏懇乞未知遂否人回敬



此布謝不具

答白巖

承教感愧無已桑榆之境無人世望矣而  
温旨稠疊斯生斯遇稍可勉強容忍自絕  
老且病誠不能矣又此遷改似涉擇官徒成陳瀆奈何奈  
閣下知某固相諒也不具

答山齋

承書諭辭疏太瀆罪愧罪愧名湏實副恩重而報亦重某  
材行何如耶愛國雖素直突不善處事所至無好散場  
若上孤主懷下不副人望平日此子讀書護惜處盡

去徒自辱耳昨聞上心朝論皆若厭煩瀆懼罪速舟  
而來而舌為缺齒割腫語言甚難入京正用此命薄甚矣  
部諸司暨鄉相厚親友幸密告容區區見後下顧京師非  
外比萬勿出迓至祝至祝

答遂翁

令孫至承書教感感壯猷耆德元老相  
新主以經理太平士心俱屬亦華夷之望也區區貂續九峰白巖幸庵  
三江諸大老之後硃璞之不同價然也事叢身益度每及  
歸諸老輒相阻不知平生僅此易退一小節茲出相併以  
去矣八月九日當官三月滿當力請骸骨卯橋夜話當數



是素集卷之三十一  
書  
三十一  
夕我也忙中不及細書為道之軀保愛萬萬

### 簡幸庵

數日官書人事作擾而身亦困甚不及親拜床下道勤悞  
罪過罪過 執事素忠大節一舉足繫 國輕重當此  
主習未定邊事方殷豈宜引疾求去 溫旨既已諭留  
幸為 宗社華夷勉起搜易謀臣計將為 國勢主張  
為三邊生靈造命至幸至幸

### 簡諸老

乞休第二疏久辦議二十五進比聞求去太多 聖心  
不悅移二十八不謂又有亟出之 旨憂虞滿腹某常

懼跪拜難起膈十二之夜夢 承 旨內廷跪不能起

驚覺益懼益見力綿 廷拜幾跌者數四歲暮孟春

大祀俱不敢陪何心哉除夕正旦家祠諸拜皆不能起開  
印拜跌在地對僚屬抱愧殆不堪居繼有痰欬潮熱之證  
身益弱今承 命而出何以了此五拜萬一亦跌何以

見人某平生自此去矣抑七十二之年精力可復強耶  
閣下素荷憐念亦幸為謀誠明良之會何故亟亟去也稟  
曲萬千病不能出不及面訴謹此祈請得遂南歸君相再  
生恩也不具

### 簡石翁



昨承 敬翁礪翁湖翁三大老枉顧某備訴衷曲若謂有  
托焉而然豈不誠諒彼假此爲留某之辭爾某受知 四  
朝今日尤爲竒遇 聖天子垂容諸老垂念群大夫亦  
頗相信若可一日安于朝 主少國疑言階賈異奸伏  
伺釁何時也又若未可一日去于朝斯生許國之壯心熱  
膽安在哉某視聽步履猶強支惟跪拜難起不可強支兩  
膝時擦健步藥時服七十二之老求壯亦難矣寒家三世  
近諸弟皆收局風痿某是局也前 亟出命下戰慄無  
容促九峰未能赴閉門學拜搖曳數三至第四拜而跌朝  
叅何法哉天賦命薄如是負 朝廷負知己負天下之士  
夫言之心痛語梗泪赤下抱罪惶惑莫知所爲惟 執事  
幸卒聽之至祝

答張總制

久乏存問孤特庶重之操貯結之星瞻岳望之間蓋日加  
而歲以甚价至承惠問感感東之寇流入南陽勦未絕不  
知廣何如民貧召盜廣又以習而成 君相之憂 執  
事當任之責也日者國是頗異功高物忌諸賢意未知云  
何恐易柱不得本事大木重致撓敗某欲去未得去尚當  
繼乞忙不具

簡石翁



身素集卷之三十三  
千金駿骨仰荷 厚情似有議非誠欲去者添此話說也  
數日膝尤軟堂堦上下皆難勢難拜飽厚祿高坐心難安  
十二三進第二疏二十進第三疏幸屬中貴傳衰老之故  
必取 俞旨九月吏事何裨 新朝決不敢異遺  
恩有亦決辭徒見重瀆夫道大成大小成小某歸亦成小  
一得今年更幾人幸惠專然不具

見素集卷之二十三

見素集卷之二十四

後學黃佐校正  
孫男 及祖重梓

說傳行狀

邃庵說

豹隱霧而成文龍藏于淵以神變化兩下士夫資之弗深  
無以為致遠之地而息煩鎮躁要非淺之能為也故深居  
而晦處捐塵絕俗百物之交弗至則無誼聽無流視左圖  
右書前箴後傲助我者有餘地夫石淙楊公應寧藏脩之  
居擇最深處為之名曰邃庵其取諸此其制乎外以脩乎



身素集卷之三十四  
內足乎內以無分乎其外者矣夫馳情繚意於無何有之鄉身在此而心已在彼欲一時之靜不可復得也則庵外也圖書箴傲猶外也公潛乎其內也寄庵之邃以成其心之邃其業專專則志一其居靜靜則神清則視無形聽無聲心有師氣有帥欲有坊道有奧聖賢有域探微造妙以統百靈搜羅萬有孰得而淺狹之公起神童第進士方方物出謀之始固已累有上卿完名修志朝士莫肩視以班顧自貶抑深造弗懈及門指授斐然成章其他亦波餘于楊氏矣蔚人文澤寰宇前瞻却顧庸非公而誰邃之功于斯爲盛

因吾字說

予與劉君時讓舉進士同觀政刑部同步行履數日輒穿駐足抖沙相視失笑其後同南京時教方易齒有敏名再見則驚視之矣今已博雅可詵以吾時讓之命問字於予字之曰因吾說曰道根於性性根於天之所命人與聖人亦類也聖人脩道爲教不過因吾所固有者裁之否將憚而弗信矣弗信民弗從聖人亦曲勞而無功矣夫不勢而尊不威而畏不賞而自勸不令而人樂而習之非通以至易不可聖人有待焉使人自有而自爲之又將通之曰人倫日用之常吾之道盡於是而已耳則人將曰固是之易



邪則均可能也吾將勉而為而不為去聖人遠矣聖人又待焉有可入之機可進之地又將通之曰道德性命之蘊吾之道盡於是而已耳則人又將曰固是之未已耶吾將勉而為而不為前功棄矣有可入之幾可進之地又將通之曰有天地民物之責紀綱造化之妙焉吾之道盡於是而已耳則人又將曰固是之無紀極耶吾將勉而為而不為則前功棄矣揆事就中探微而入妙吾斯之未能先得我心者可就而叩也吾聖人師焉聖人不恆存存於書吾書師焉卦畫於龍馬範演於神龜火鑱於辰心曆於天運輪於轉蓬律於鳳凰書於蟲鳥造化之蘊聖人心術之迹也聖人之迹師焉吾心者可會而兼領則盡乎吾矣非吾者烟雲飄散蟻蠓氛埃之過前又惡得因吾固無而規其必有耶此學法也持而不已吾於因吾觀矣彼謂聖人不足師與不能師均妄也

族子伯隆字德符

吾友林公長深同予出邵州刺史後徙福唐之甘蔗州又從尺籍于莆樹潛德數世矣竟符于吾友以刑部主事求養母而南又求養母棄按察僉事教授常州忍貧自節養妹氏百餘指是所謂難者常言術者言吾當無子既而得伯隆竟出于數之外德之符至矣伯隆懷抱尚未煖指掌



見素集卷之三十四  
言  
三  
翫弄尚未能作嬉笑聲吾友背而去之矣是豈待予言而  
悟哉伯隆鞠子二寡母冷熱失調兩心俱碎是豈待予言  
而悟哉寡婦之門不入予以伯隆故每過呼出拊視頭巨  
而軀幹小不稱人意予危之久之駭異既又異今則偉然  
長身可壽可立可爲吾友慰矣人孰無子有如吾友得伯  
隆之難背之早隕息有餘念二寡母特百常情於鞠育之  
間者哉天與人恒相符德有後恒理也伯隆孝友所立慈  
與節鞠而抵于成者其常人子之心哉字伯隆無德符可  
念之哉由而上什百其身一伯隆焉由而下什百其身一  
伯隆焉念之哉

鄭氏三子說

師德君三子予表甥也秀穎澄潤治士業若有所成可  
大鄭氏因子廣命名與字之始終告之軒偉勁特離風塵  
凌絕霄漢摧群而懾類以操有彈擊之柄爲鸚凡羽族之  
剛無過焉傳曰衆鳥累百不如一鸚一鸚其九霄乎負青  
穹絕雲氣背若泰山其翼若垂天之雲爲鵬凡羽族之大  
無過焉傳曰鵬徙南溟搏扶搖而上者九萬里一鵬其九  
萬乎長翰踈節脩勁而素翎氣應金聲音中律呂爲鶴凡  
羽族之清無過焉傳曰鶴鳴于九臯聲聞于天一鶴其九  
臯乎鸚至秋而疾鵬六月息者也露八月瀼瀼則鶴聲清



見素集卷之二十四  
遠君子值其時以神其用剛其鶚之職吾懼汝之嚇及鷓  
鷓也大其鵬之體吾懼汝之笑貽蜩鷲也清其鶴之性吾  
懼汝之食爭鷄群也其各思所從事哉君子陽類一爲少  
九爲老老變而少不變一汝者所以名端養蒙之始也九  
汝者所以要其變化以成其德器之歸也汝兄弟念之極  
其高九霄可也極其至九萬可也極其清且遠九臯以聞  
于天亦可也三子曰唯

彭良佐字序

從吾彭惠安公請老僅孤弱一孫舉止無味有餘虞焉公  
歿輔四歲予獨深公後爲念時時屬其家撫視擇之師教

之而慎其所與遊每視輔肥瘠學進否以爲戚欣不知輔  
思副其祖何如也又惟古時周篤行甘貧力古道可爲輔  
依以立爲求女婦輔許焉今輔將備三加成六禮字無予  
宜也昔魏攸識李德林公輔器字德林公輔予未敢遽識  
輔識公當復始于輔也字輔以良佐序皆公說也公由幼  
無穉習存省言論古聖賢自期一入官即古名臣程法刑  
部屬則何盱江齊名王三原爲巡撫並擅忠稱弘治初  
朝賢爲盛然風力節槩問學皆無能右公弘治之政視成  
康而文景貞觀不逮仰窺我孝宗之神聖而諸賢佐  
理公有力焉所謂國著龜鄉典刑良佐無踰公者在天下



猶仰之况鄉耶在鄉猶仰之况州邪予嘗觀謝靈運王子  
安文宅自豪然不爲康樂文中粗幸仲弓之群季和之或  
若謂有孫而忘漢君子憾之惟東京之楊襲忠繼白  
四世公相彭固楊氏後果不及邪良佐爲之而已

壽州一子說

壽州弟待受年雖四八子四已冠其亦盛矣夫吾併字而  
告之夫名生而別之也冠而與敬其名也德而表由賓也  
德而勵由吾也弟子猶子吾有愛乎哉君子之仕仕道也  
非仕仕也投魚水而運彌泰否安危斯繫焉遇汝志乎  
所貴佳子弟以承承往烈者也紹聞衣德興衰絕續斯繫

焉適汝志孝懷竒應會禪化而經猷謀治者擇焉燕石鞭  
賈其足重也哉適汝志賢君子陽類日升其道以明昌也  
而善處乎明又莫如晦暹汝志晦君子終日乾乾自強不  
息半途而廢遵道者之所無與也達汝志健道中焉而已  
過不及均耳驚前而躡進者最害道君子弗由也逾汝志  
中夫起落通塞有數焉存心養性盡之我以事天也八元  
八凱八士虞周之際意今其時矣五桂三鳳八龍一家之  
際意今其時矣十德九牧聯桂吾家之際意亦今其時矣  
六子者其追似之作吾林之氣以仰符國家之盛望六  
子者如此



字黃應軫君壽說

故人子應軫來告冠期予爲之私慰且感焉賓之役筋力有弗逮也字而告之曰南方七宿合而爲鳳赤鳳謂之鶉井鶉首鬼鶉目柳鶉喙星鶉頸張鶉喙翼鶉翮至軫謂之尾軫四星中一星者長沙明則人壽壽人所同願尤以願軫也夫神完則實實則明日月者陰陽之宗精之所積也欲淨則虛虛則亦明水鑑之靈照也軫何惜一身之慎致其實一心之慎致其虛乎壽地也壽無獨爲軫願之軫無他兄弟母氏依爲命壽軫壽母也吾易菴一脉寄焉壽軫壽易菴也象賢累盛以上承于先壽黃氏千百祀軫始也不孤矣毋自恕哉作君壽說

鶉說

洪之山多灌林鳥之所依也其下有昂而壠夷而疇藪而區者焉黍菽稌蕘魴鱮鮪鰭龜鼉百物之鍾也群鳥利焉居人病耗已思逐之執彈若臨之鳥色舉以去有鶉焉攫腐糞以食彈臨之觸樹有聲鶉且去彈復臨之中翼如癢鶉曰嚇止是耶食且宿如故觀者曰鶉誠亡慧哉寥廓蒼



黃遂谷盤岡孰非若之所顧決百死于死樹腐廳哉居人  
曰是固形巨而處高視吾弦特綿黠將量已也且獨不聞  
鶉之詳乎醜形詭狀附陰妬陽取郊破巢戕巖倫類覩者  
悸其形聞者愕其聲以虞弗祥楚畏其留吳憂其徙朝之  
人欲羨分其肉以盡亦奚意彼哉益厭而益彈之鶉習焉  
磔其丸以戲居人恣不能久之獵者過焉引以勁弦絕膺  
而斃

傳

丁補齋先生傳

先生諱璣字玉夫丁姓潤州人宋叅知政事觀文殿學士

文簡公之後大府卿總轄華七世祖也祖寧棄建寧右衛  
經歷隱于鄉自號友陶是生先中書舍人元吉學行高古  
學者稱易洞先生先生服習庭訓疑未早悟慨然求道之  
志十歲屬文有趣尚十八抗顏師席是歲領鄉薦又四年  
成化戊戌第進士乞假歸潤迎婦張氏明年還授中書舍  
人與同官烏傷王君汶並名古意王年長踰倍尊爲益友  
吳文定公原博費侍郎公廷言皆丈人行禮若平交陳石  
齋公甫至京師先生日接道論久而歎曰石齋克已功到  
其所學大類象山吾儒湏內外動靜交養互發甲辰歲除  
星夜殞乙巳元日星晝殞俱有聲先生應

詔上封事



極論治道本末時政得失反覆數千言大要以正心爲根本教東宮振紀綱正風俗慎用人重名器蘓民困理財用飭兵備爲急務末言方士釋老宜加痛絕疏入留中群姦切齒伺之無分毫失久之以同官公過連逮出判普安公委北上次辰州聞 憲廟計三日不食 孝廟嗣位起三原王公介庵爲上宰公功業自効聞先生至邀坐後堂咨訪竟日明日再邀不赴具言今日大本無急正君然非一人一日之力宜早堅 主上嚮道之志開進賢之路庶本正源清制治保邦可次第而舉言甚切直介庵受之欲引吏部屬爲忌者所沮僅判廣信未三年凡再上提

學不果先生以易洞憂去位服闋即家授興國知州居八月以錢孺人憂去位服闋倪文毅公當軸收拾名士即家起致仕僉事章公懋爲南京國子祭酒先生爲南京儀制郎中未四月遷廣東按察司副使奉 勅提督學校歲

餘入賀道清遠山水暴漲舟且覆先生衣冠祝天度不免闔窓端坐與繼室陳氏二女丁氏伯子咸叔子尚季氏啓一家十一人俱歿惟仲子同與一僕以他舟僅存嗚呼酷矣弘治癸酉三月十五日也生天順丁丑五月十有九日先生德器充完涵養深粹圓運方晦含顯靜待動長不踰中人而信古任道有萬鈞之力崇正闢邪有萬夫之勇至



於群吠衆譟不震不撓則又有百鍊之剛焉誠孝天至伯叔無異財親喪骨立儀禮襲用無遺至身無完衣子女踰期無力爲嫁娶噫亦難矣位署清局無事樞無言柄將欲一身任世責之重而盡還淳樸之風愛君憂國性真然也教人必先心身四方從學屢恒滿戶外先生必正容端坐澄心定氣使燥慮消息方與開講辯析疑義細入毫芒而文字正大不涉荒怪故門下之士成大名掄大魁青緋中外楚楚焉嶺南教法以厚倫爲本格物窮理爲務脩身而達之天下爲期假之數年文教可知也先生爲政以風化爲先而誠動之普安夷酋有贊禮將先飲以示無毒先生

曰何不相信如是飲其酒却其贊夷酋感畏遵約束終先生在不專殺一人時輸納絕火葬歐冶所授科目於是乎有人信有兄弟爭訟者先生久不決曰將使自感悔耳既而果然薊溪義勇以私隙誣隣民爲盜斷其舌而汙鬻其妻女隣斃獄中先生宿驛舍夢若聲寃狀詰旦果得訴者一訊而服未豐銀冶群盜時竊發先生巡視解散同寅坐事先生爲曲處乞印易牒獨執不從曰某平生惟辦此一片心事君果誰欺耶其人久自悔服遇事詳緩慎縝不用爲沽釣士君子恒信知者姓名時見薦剡王介庵對人必曰佳士佳士予長先生五歲始識之同年稠衆中委蛇暇



身言集卷之三十四  
傳  
豫德輝動人自是屬心焉先生亦誤與可左官姚安無復  
敢送者獨先生與楊公邃庵數君子致詩先生復徒步十  
許里爲別則知已鬻馬爲論列計矣予既復官先生亦就  
謫所龍關邂逅因得拜易洞舟次益信先生所得之深又  
數年過潤則先生之廬不庇風雨予括囊僅助二金嶺南  
之行僅助一公服又數年又過潤則先生之廬幾不可入  
矣或問先生儒而迂何至一第不治曰有之簞瓢陋巷顏  
子則然何至女子二十六不嫁曰有之程氏孝女明道則  
然在士夫亦有異議者曰有之閱道不識濂溪則然先生  
其猶幸于今之世無考亭之難處者抑儒運之衰一至此

極而天亦有所陰佑於不獲已之間爲承祧之地者先生  
號補齋所著有補齋集若干卷大學疑義一卷洪範正誤  
一卷四禮儀註若干卷中庸語孟易說未脫稿又欲繼朱  
子之志以儀禮爲經禮記及諸經有及於禮者爲傳而補  
以註疏未成書云贊曰儒學不傳得其門者或寡補齋蓋  
將有意焉冲澹渾融窮探力贖而志之所向不息不岐觀  
其行已事君誨人著論大略可見已使得幸而及程朱之  
門淵源之續其殆庶幾焉倉卒水禍一信始得屍而衣冠  
端整殆所謂俟命之至確乎其不亂者斯補齋之終也

雙松先生傳



雙松先生諱鑿字世調世爲枕峰林氏宋神童科進士禹  
臣子津龍爲常平幹辦公事稱常幹林遷塔林稼翁也四  
傳爲封戶部員外郎公樵樵四子伯雙松與仲子壑季子  
空允傑特伯仲先長遊吾莆從編修李先生士英授經攻  
苦忍淡夜讀盡四鼓啓明見復讀成化辛卯伯仲領鄉薦  
壬辰戊戌先後第進士伯戶部仲工部皆主事員外郎郎  
中其後雙松爲宰臣所知拔勲部壑復除祠部皆有宦業  
雙松允開朗有犯委委謝過不屑辯枉直淺中狹量諛嫉  
險刻之流見之風消權闕柄將陰易故武以無甚民厲嘗  
監內廐芻粟官坐守支死妻子不得歸爲處得歸太倉視

事絕齟齬寅入酉出比歸過午門率漏下十四刻寂無人  
聲猶局步斂容疾風甚雨無異爲寧德林莊敏吾莆翁司  
徒所知父喪服除不欲安要局復求戶部復戶部尋擢以  
爲湖藩叅政分守荆南歲餘視藩篆藩務故叢委加以三  
藩府之建三親王之之國十數巨璫之奉使歲之賓  
興供臆紛拏爬梳有餘直餉軍都勻預文綺之賜弘

治丁巳陞中奉大夫廣東布政司右布政使省公徑澄吏  
弊抑柄臣進香之擾時議縮師生膳費雙松曰爲國育材  
奚費窮治驛遞私廩曰法去太去甚下官祿薄未易責之  
深夫網密則姦起破觚斲珣蒸蒸而俗阜秦漢往事鏡戒



也疑獄多從末減貢院增闢爲新巳未轉左廣西大夫階  
通奉兩藩連壞雙松念母葉宜人老獨身迂道兼程數千  
里而至至前一夕母病卧床褥顧叔子址曰思見而兄址  
曲意慰懷曰且至翌日果至慰問悲喜踰六日母逝視藥  
視歛因得以自盡其情凡三過家壑率以公便偕至寂後  
壑爲貴藩叅議兄弟金緋塗亦領鄉薦隣曲聚觀爲榮既  
喪母無意仕進玩易攻詩泛涉數學與二三耆英爲秋江  
泛月之遊望六猶未舉子涉秋園亭前西瓜突出一本塗  
謹護之祝曰瓜結兄當子果結是歲錫福果孕戊辰冬季  
雙松病不起目錫福念之屬意于塗沐浴衣冠而逝二十

九日也年六十五枕峰壽丘之原雙松蟠鬱愛之號雙松  
運剛於柔括顯於晦售直於坦植廉於同而處之一以仁  
裕自視若無官親舊衰落之門衣食婚喪人爲之地藩之  
長入覲行費皆出區畫比入賀長一無所謀公有所預亦  
靳無與長去贖復厚有詰曰同僚如弟兄何相猶耶人服  
其量愛弟誠至腴田一意爲讓所居竟舊廬囊無贏貲或  
疑其詐曰不可欺者天耳所著有愧遽集 贊曰易包荒  
得尚于中行書有容乃大韓魏公之博大程伯子之春風  
王文正公之引咎不辯富文忠之不問詬者溝澮河海之  
不同量信然哉福唐泉山誠齋雙松同時稱三林誠齋恂



身素集卷之二十四  
傳  
恂退讓泉山雙松無可無不可和不同溫潤而栗所謂君子者二公躋要詣極雙松資望已偏竟不復起以左轄終爲世遺材有幸不幸者

謝都憲約庵傳

謝約庵諱士元字仲仁世爲長樂僑姓童孺時嘗獨卧僧樓祖母夢大星起樓上異之諸孫方治經即不局局舉子一事第進士爲主事分視京儲論時政與中貴異求之無可過王忠肅崔莊敏知之薦爲建昌知府始視事訟者懷詐牒滿郡庭公立發數奸其一方出券公遙叱曰何僞乃爾訟者愧屈人驚以爲神其察事舊而券新也爲治先化

後政骨肉之訟先教之悔南城民鼓妖石佛蒙腐鼠棲之屋以集群鴉公碎之魯巫托神妖言禍福公至托畏公去無敢復妖郡衛並置武流入私餌庇盜竊無虛夕公怵以法盜歛新學宮聚書萬餘卷禮器樂器以備暇則臨視督課按射禮習行之士賴有造川嶽之氣亦於是乎還狀首則張宗伯昇三魁則羅少宰玘甲科裨續斯爲盛祠李泰伯墓表孝節門梓行敦化表忠勸學圖詩以流布村市歲再饑再發粟既盡繼之以俸以歆感延糴建恃爲命夏巡視時正旌其能進階與 誥封其父磐中憲大夫知府母陳配陳皆恭人秩滿民乞再借 憲皇帝進其俸命



身素集卷之二十四  
蒞三年以憂去郡補廣信聲先人習瀕代處山民盜鑛擾  
求豐猶自引責耀兵靈鷲爲諜者所誤入其伏筦中左股  
公裹瘡督戰大譟殺入賊大敗俘其首塞穴而還分守東  
川夔之東鄉連三劫公立城戍擒捕數百賊建始土人豪  
奪相讐殺奏訴殆無虛月事干湖川徃徃怯深入違期會  
停案養頑公徑徃繩數魁直之士人大戒韓司徒文時在  
同事服其有勇吐蕃二姓擾邊公徃經略聽宣諭而去弊  
孔搜剔邊儲核隱石計者十三萬而畸卹故官鬻蜀之流  
餓衛之還鄉而收瘞其道死自叅大政右布政使右副都  
御史在蜀者八年蜀之人益恃爲命性疾惡吳叅議英者

輕狡善暗計必無利于公據數事奏之按無驗英坐誣愧  
死公召還病乞骸骨而歸歸四年年七十以卒公天性孝  
友出視官入則色物爲養終其身兄弟無異財俸之入弟  
主之嫁具姪必子均食口多自粥以先家衆族之貧生而  
舉火死而藏賴之沉實善任所至必欲流盡惠屬人故始  
而愛繼而思建人構生祠樹遺愛碑其再經于建也民空  
巷走迎豚肩法醢效殷勤者肩而入歔噓泣下公爲之酸  
楚慰遣而去嗚呼政之得民有是公之學尤發於詩所著  
有約庵集詠史集行于世子廷柱廷棐廷最廷柱今爲湖  
南按察僉事見素子曰民命于君而司之守也漢宣帝有



見素集卷之二十四  
言與我共理者良二千石黃次公劉祖榮寇子翌在漢之  
理有足稱者成化間郡多良守盛延平顒楊嘉興繼宗公  
建昌尤名治行皆躋位中丞公以民願三年留不按選格  
咈時宰意既去建猶補信州未滿四十日又補永平一守  
留滯幾二十載自信而違俗難翁張如是斯循吏之所獨  
少也

行狀

贈文林郎監察御史陳公行狀

浮山義士陳彥貞甫豐頰長身少年學雙舞劍棄就伴讀  
郭學經有司強辟通掾猶用儒進取久不第遂就掾試

得七品秩待次銓曹大宗伯胡公榮重甫風格延致西賓  
屢欲論薦甫辭謝不可歸省親于家正統己巳虜寇我北  
鄙英宗睿皇帝親提六師正其罪權奸擅柄乘輿播  
越南應募爲千夫長統三十六州縣兵與虜戰鴈門躍馬  
突陣出入如飛虜應弦斃錯愕走逐北數十里關賴以完  
巡撫朱公鑑深加獎勞錄在功首庚午戰代州陣于北門  
虜衆多吾兵少圍繞數重矢下如雨甫出殊力死戰虜震  
却甫奮擊潰圍多所殺傷時盛暑甫憤國辱痛心疾首日  
夜不解甲血汗沾背力竭病渴數日死七月三日也葬天  
壇山之原得年三十有六諱福贈監察御史陳之先大原



身素集卷之三十四  
人元季兵亂徙居浮之北王村曾祖信卿祖敬父俊皆隱  
德弗耀母唐氏配楊氏年三十二先卒贈孺人繼范氏封  
孺人楊孺人二子長政南漳典史次孜湖廣按察副使字  
勉學居靜任煩能持廉名宦業方未量孫男七人大經國  
子生大綱邑庠生大紀大韶大武大夏其一大綸早世孫  
女六人

曾孫男一人應奎曾孫女二人范孺

人歸甫不數歲而孀年方望立已無遺血能矢不二天教  
撫前入子以借于有成裕厥來昆君子謂能節而愛也年  
七十二弘治癸丑五月五日亦卒計至勉學棄官服喪謹  
詣俊曰孜七歲喪吾母十二歲喪吾父熒熒罔知墓石未  
刻今將祔繼母于封將求有道者銘行實之狀將以累子  
遂受爲之狀以俟採擇焉

吾母安人黃氏事行

吾母安人黃姓東里人唐御史滔宋狀元公度之後父諱  
滋青田訓導母林氏陝西按察副使時之女媿賢儷德吾  
母既性且習及歸吾父主事菊庄翁吾高祖教諭三復先  
生規範整完吾曾祖處士德齋公曾祖妣方孺人爲子婦  
賢吾祖教授敬齋公爲諸孫又賢當是時家法稱吾家方  
孺人俊及見焉吾祖官在外吾祖妣趙妣皆先世奉事太  
姑諸孫婦任責焉方五鼓序立床下問安否一應對失節



門啓閉有聲即叱去黎明梳洗坐堂上諸孫婦東西行授事曰髻弗整倉皇後至行步身動搖又叱去日較所讀書園圃所治之業烹調紡組之職一不可則又叱去無免者獨吾母能得歡心方食少善飢吾母日進六七食稀稠酸澹默符其意善感能調冷熱之候氣善滯能摩熨以居流暢善魘則伺其睡熟扶俠側卧移其手不使覆胸既安適徐出織麻課俊兄弟書欲卧則曰俟盡此麻或啖以時菓以起勤事頃復往候方魘則微呼或爪其足跟出息以接其氣既甦誘與語既睡方就寢及覺又已在旁問安如是者夜五六起蓋衣不解帶者二十餘年稍疾則徹明不交

一睫彌數月不厭藥不俟試如其分有新物百方致之方有姚氏甥鞠于家吾母百心撫視以悅方意方嘗曰吾無是婦前死十年矣又曰汝必有厚報又曰汝俊娶婦吾目瞑矣方歿年八十有六手二簪與俊曰吾不見汝婦蓋久辦也吾母曲爲逆婦時俊年十八跪言曰幼習未定又祖未大祥不可方曰言是吾祖亦吾母是賢在揚州命侍官次吾母曰太姑在不可以行遂促吾父携少母楊以從楊與吾母處四十年踈簡多病吾母躬調美食致之楊或不食候強之子同仁均視人莫知其嫡庶家雖無多積然賓祀曲致厚潔有求曲畀之至自落其衣珥姪婦求履材無



可與者時方作吳氏妹嫁被彼戲曰是可剪矣即剪付之  
既之被不成人以爲笑三族加割惠吾伯父母外祖父母  
吾舅喪葬族祖師禹師堅師通娶皆力相成事劉氏表妹  
藉庇允多陳氏姨三子遂國子學正琬瑯舉子業皆有聲  
一歲俱死成落門吾母令吾睢州弟侃與傳各許一女聘  
其孤平生無深坐無疾言無見喜愠方與女賓坐報者曰  
二郎鄉舉俱中謂侃及崇明弟僖也吾母不答又報頷之  
略無動容盥浴食飲客至索茶酒未嘗一呼侍婢雖俊輩  
竟不能知其音吐大小其所徐答則其所未愜意者也俊  
兄弟少學罵人禽獸則曰村俗何異遂不敢罵人疾走則

曰無急事俊言直得子有奇夢以語所知吾母曰驗未蓋  
刺躁也吳氏妹死殯之婿疑歸其資盡笈笥出之母指一  
簪曰是借之某者餘留新婦宋氏妹欲爲其婿求進身於  
俊以屬吾父父曰屬汝母吾母日三至軒中亟去故無是  
也疑爲覓遺物不荅久然後知其重於言吾妻性頗急請  
裁之吾父曰汝母能是耶吾兒倦於學請教督之第曰當  
學素少病嘗一卧床褥吾父嗚咽不自勝顧謂俊曰吾得  
後死供香膳三年報之足矣汝母之善有非人所及者問  
之曰是豈可兒輩道耶蓋吾母年四十即自居老成有隱  
德焉至老紡績不倦夜率盡二鼓俊懼其勞笑奪之坐少



頃徐取將事又奪微笑曰母妨也足不出閨門雖孫婿輩少見其面見亦不交一言或曰家俱平安則異事也俊方伯命下有司勸駕焉俊辭焉姻族議不可吾母曰任爲之中丞命下有司勸駕焉俊辭焉姻族議不可吾母曰君命再辱母辭第早歸耳嗚呼不孝違吾母之教矣其如何其如何嗚呼吾母幽閑貞邃恭順慈孝侯唐未足多也俊豈敢誣吾母俊出餘二年六疏求歸皆不得報今承乏巡撫晝夜勞役期盡歷諸道以報上恩遂自劾擅離之罪徑歸不謂吾母計聞矣弘治癸亥七月廿又八日丑時也生宣德戊申十月十九日戌時其造申酉戌亥

或曰德之異稟之純也男女八人俊侃傳僖吳氏妹吾母出佐方氏妹宋氏妹楊出吳方二妹早世孫男十人達遇適遴適遠近暹達週女九人曾孫女三人墓在雲庄勝塘十二月二十一日其葬期也俊嘗欲傳吾母事行以爲家訓因循有今凶疚荒迷續述弗次舉一而百漏不孝何加焉惟大君子評隲以籍手求言史氏不勝殞越願幸之至

明文懿公楓山章先生行狀

楓山章先生諱懋字德懋號闇然翁澱濱遺老其晚年別號也蘭溪純孝鄉人上世自建之浦城來族代有令人國初起人才不就爲叔良甫公祖也質厚有鑒識贈朝議



大夫南京國子祭酒爲申甫甫公父也無擅遂無獨成贈  
恭人爲吳母也公生正統丙辰壬午魁于鄉丙戌試禮部  
爲會元入翰林爲庶吉士爲劉文安柯竹崑獨與不涉交  
潤劉云然詩本諸志而文本諸道柯固云爾也編脩甫四  
十日偕同官黃未軒莊定山論上元烟火非是謫先是羅  
一峰論首相不當奪情亦謫時稱翰林四諫爲榜得人毛  
給諫弘論救改南京大理評事由儒飾吏不腐不深南俸  
入視北乎縮例益以堂隸崔直之羸公獨無益遷福建按  
察僉事體仁藏用與道弛張沙尤泰寧閩漳山海之寇皆  
有以侔其魁離其黨以默囿完醇之故而賁桴土鼓非世

觀之習也三年疏致仕以去尹莊簡固留不可三詰而終  
不變時年四十一人以爲難既歸其貧守道奉親外閉關  
讀書畢心體認之學而言必根志志必宜用用必副功楓  
山授受提挈綱要以自得悟領之精蓋至是公之得益深  
士之風爲之一變學子至不能容白沙一峰定山皆極推  
與朝論時有所薦張莊簡儲殖庵潘南山尤道味同也  
孝宗朝南北缺祭酒倪文毅起謝方石于北公于南時未  
終制詔虛位以待既就官開示近裏南士意若無竒比論  
理道探索幽隱論天下古今事若生其時履其地處分其  
虧成五經論難若寸筵撞鍾迎手而應然後知書無不讀



理若事無不會學政時政有疏勤聖學重詔令謹天戒隆  
繼述謹大婚疏 武宗朝如此前後兩乞致仕 温

旨勉留有老成端謹聞望素著宜師表之褒既三年三疏  
請老而自問醫東下南京太常卿辭禮部侍郎又辭既致  
仕檢壬鼓奸綱常易故縉紳罹毒在 宗社亦爲之搖

公明炳幾先而憂同在位者蓋怲怲焉江之寇陷浙公移  
縣城矮屋三間左寢右爨門垣不能備侍御鮮君冕張君  
縉給諫徐君文博守劉君菹時疏舊學者德表以風

詔加存問 上入正大統再用言者薦加南京禮部尚  
書致仕有學行老成名實相稱之褒報至公已床褥曰噫

無以報爲也疾亟與林守有年論古今事與姪贊論君大  
夫保天下國家之本取士會父子庶幾未旦故居之前星  
隕申及化辛巳除夕夕也壽八十六善類相吊皆曰章先  
生亡章先生亡公仕籍幾六十年官僅三考立朝僅四十  
日城府不見其跡者四十餘年義利界軫表坊立第辭之  
甚峻易深而善於用健取乾定取履順取巽固取恒粹中  
貞格真足以歆動一世表律天下之士夫不知古君子何  
如配郭恭人善共艱難先卒子振擴捷孫訢曾孫衢試皆  
夭歿誥不慧少子接八十二始生今始五歲天固章氏念  
也壬午三月癸酉姪方伯君拯奉遺命長山祖塋以附以



見素集卷之二十四  
與郭乎合以不煩有司既畢事檢其笥文幣數端二婦穀  
五十石妾尚無遺完名始終其偶然之故哉 璽書存  
問之使及門已不待 賜葬賜祭贈太子少保謚文懿  
皆身後之遭事行門人董遵記爲詳所著有楓山集婺鄉  
志誌蘭溪誌所輯有諸儒粹語宋史刊誤未成書俊臭味  
偶似出處大致亦殆有同者楓山還往拜里門而參几杖  
抵足前席時若有所寄是日何日忍登公之堂哉景仁之  
傳後死者之役也捫泪評隲俟立言大君子碑有道者

見素集卷之二十四

見素集卷之二十五

後學黃佐校正  
孫男 及祖重梓

贊

南京禮部左侍郎樂清章恭毅公忠在朝廷名在  
天地紀述在史官典刑重在後進俊辱公子給事  
順德交獲覽事狀豔慕公益深謹作贊曰

爲而難時而又難奚覲而安楚而毒鍛而又毒奚仰而告  
胡以見剛公也斯償胡以見直公也時式疇曰匪天公死  
載完疇曰史亡公世載光天錫公社公穀而齒天錫公社



公令有孫子

族祖伯安公贊

完樸道散百途競新公樂其獨自序齊民緣達任曠駢首  
進趨公違塵枉辭辟中書孤遊遠蹈體素含真知白守黑  
執謙如盈述作從志歿弗終否吁嗟先生叅軍之父宗伯  
之子

方水庄像

此吾友水庄之像其行樂時也意度閒遠不問可知為君  
軀幹脩偉繪事化之要其妙不在此也東坡自規其貌於  
燈影之間把玩形似譎浪諧笑朱墨之工亦末矣毓晦丘

樊無求聞達公車不登而鄉曲有令問鹿門谷口居然風  
致种放董英之議無及焉是為寫君之像

題達小像

盛年何自多病達多病又未有丈夫子學成否未得逆知  
也皆所宜為念者命作小像進之曰達吾語汝父母惟疾  
之憂夫子所慎在此也念之哉子承父後汝為長宗祊汝  
屬也念之哉形天地間靈而秀於物者人汝形貌人也亦  
具所為入者乎靈而秀於人者士汝巾汝衣則士也亦具  
所以為士者乎汝懷抱之隱道風行業之顯然吾不得而  
知也吾欲汝為子瞻汝弟適子由吾不能老泉欲汝為純



見素集卷之二十五  
仁適純禮吾不能希文欲汝爲伯子適叔子吾不能大中  
獨汝愧乎哉吾老矣所不能爲汝兄弟及爲之念之哉謂  
子賢愚不足掛懷抱任達語也孰不愛其子教之聖與賢  
教之的也元亮責子天道苟如此且進杯中物堯夫亦謂  
望子大賢不知天意從否二賢距拔穎脫流俗外於諸子  
特未忘情爲善由已聖賢可學而至無與於天也借天而  
言責之子者至矣父見素言

題長城林氏始祖沙公贊有序

公諱沙字用淘林氏入閩黃門侍郎十九世始祖也居長  
城惠寬翁父也公起省元爲台州知州卅爲宣州同知

子伯氏通判昌徙穀城季氏節推旻徙梨嶺仲氏提舉寶  
仍居長城孕祉毓靈駢發遍盛生中允壽壽生評事從楷  
生太常卿上柱國誕曰三世青雲者誕之子金紫光祿大  
夫文忠公英英子太常卿定定子鴻臚卿思明也曰五太  
常者誕英定思明英之弟秦之子太常少卿惟亮也戶部  
郎中堂者惟亮九世孫縣丞王者堂之孫至王子而家始  
落長城一派亦易舊觀王之孫謙德甫僑寓隙宇中雖自  
溷編氓而拳柯磔節居然古意歲時祀事懸金服紫真影  
列滿家予群兒時從隣壁伺之吾祖教授府君語曰是故  
吾族壁間者皆其祖也一孫弗立遂以有今汝曹戒之公



侯復始是後宜有興者固未宜渠易也故甫過吾家吾祖必引與亢禮是後甫之子啓善氏兄弟頗植有家諸孫頗儒業公之後又將蟄蟄然起復始行驗矣嗚呼弓箕世業也遺書手澤存焉耳今夫舊家故族得先世之告身墨蹟十襲傳寶如弘璧天球矧始祖千百年遺像瞻對有奕者乎宜啓善氏之珍愛也展玩慰浣敬作贊詞詞曰古貌長身氣清以神索而內之可詳公真襲紫承緋道業允紹窮而遠之可觀公世六物屢改公系公支大數屢劫公像公遺孰謂鬼神而不執其幾開必先晉安數百年之武貽若後長城數十世之傳孰謂天道而斯乃偶然同源分流眷

言疇昔式告來仍未思無斁

方體安贊

流不易東繪不易素從事中更服儒故步殷敦夏彝古物存焉周行蹊徑時命屯焉朝霞夕烟軒冕儻焉宜崇而卑會計當焉孰速其歸來鳥飛則倦焉委分食貧全真佚老鄉邦則勸焉

五馬行春贊有序

此圖吾友黃文大化州時也勞農勸民守之常職而化乘數亂之後人無定心四遠逃難之民與逃死之盜叅伍走界上求受屢而民先是時非誅則逐耳公開釋兼受而民



見素集卷之二十五  
處之故俗耻爲盜而盜亦盡化爲民菜闢我壤地實我民  
版而化成完州公之行春如此贊曰有賢化州政是優游  
無擇奸良並蓄而收毋扭習常干我官紀誨諭諄勤家人  
父子維昔化人泔粥紛麻自公來只始室而家維昔逋流  
骸骨暴露自公來只溢我編戶時勞時循于化之鄉我公  
戾止樹如甘棠愠有惠風旱有時雨民是飽嬉歌有召父  
公施不有在貴而貧推而放之三族爲春翌翌歸鴻叢桂  
招隱種秫開園德星東井

王石泉贊

維實維畜有舒自履動維雷行靜乃山峙載馳載奔道允  
默存以偃以息責彼之園于謙有鳴聲搜影跡謂聯其翔  
乃滯其翮莫我有知弗容奚病無成與虧松栢命正

鄭岳山贊

韻脫神灑風宣氣融有燁標表黃裳在中冥棘玄鈞心迎  
意會有黃鼎耳文成彪外流電一瞬勁飈八紘目無寥廓  
飛走疇爭曰止曰時含章于晦柴立厥中與天日對

竹亭壽意贊

匪附匪岐有虛斯直有羨斯亭淨焉如拭遠韻孤標于淇  
允式霜清玉寒作我金石

山齋行樂贊



見素集卷之三十五  
贊  
五  
揆耀含精指呼五城有翔厥酬以皇厥聲紫氣斗間神物  
化治有秘其芒一函天假立厓瘦竹真風送恬舒弗竟懷  
伊世之占

黃后峰野服像贊

后峰非時人其小影巾服也殆野之人吾不知吾不知心  
則獨畏也贊曰太始易位售贖替真孰與其還我思古人  
維高易搖維白易黑歛以若無安此晦默學由正基亦以  
虛受冥搜廣裒以畜其有絕瑕去類玉潔冰寒野巾山服  
曷有其官獨峰亭亭鄉國予眼有宣厥靈締是歸晚

睦州公贊

公諱披字茂彥挺特克實年十五手抄六經子史千餘卷  
天寶十一年年二十擢第爲將樂令遷潭州刺史澧州司  
馬康州刺史貶臨汀郡曹掾改臨汀令地多山鬼作無鬼  
論鬼竟不妖奏授臨汀別駕知州事風流人化治聲聞闕  
下御史李栖筠奏授太子詹事蘓州別駕賜紫金魚袋上  
柱國解綬四十年志尚高潔寵辱不驚廣帥薛景公奏授  
都督不受故相國常袞曰林公出處猶龍所居有青蛇白  
雀之異子九人爲刺史寶慶元年以蘊恩贈睦州刺史事  
見唐書贊曰天壽忠烈因生錫氏玉鈕金繩鸞停鵠峙温  
陵十六我公愈偉氣直道完論著無鬼出處猶龍德星萃



止休符顯祚嗣九刺史

端州公贊

公諱葦小名曾奴睦州長子初朝散大夫奏授西平太守  
終端州刺史贊曰林顯肇周百葉彌盛自固徙閩寔首鉅  
姓瀛高睦祖三葉從政篤生大宗玄默允敬作刺上州弗  
憲有令九侯並列錫類衍慶

江陵公贊

公諱藻字緯乾睦州次子兄弟業文度梨嶺誓曰彼鵠彼  
鵠睨在目堅取乃速二三子無替省試合浦還珠成假寐  
夢神人語曰何不叙珠去來比悟修曰珠之去也山無色

兮氛霧冥冥海無光兮空水浩浩珠之來也川有媚兮祥  
風習習地有潤兮生物振振果中第主司杜黃裳曰叙珠  
去來有神助貞元七年擢進士爲閩破荒弟蘊亦明經及  
第歸復題曰昔向嶺頭題姓字不穿楊葉不言歸而今各  
折一枝桂同向嶺頭聯影飛初容州支使殿中侍御史內  
供奉嶺南節度副使終江陵府使郡守陳偉祠于學事見  
唐書贊曰華夷軫懷遐農負耻相先業儒彼鵠自矢賦成  
神助破荒伊始並影于飛穿楊符喜容州江陵四仕首尾  
廟食垂慶叶平光有前史

橫州公贊



見素集卷之三十五  
公諱著小名友直睦州第三子貞元六年明經及第初歸  
州巴東令次邕州經略推官終橫州刺史贊曰薛鳳騫騰  
荀龍天矯三仁系殷十德聞趙烏齋宣靈白雀明兆及第  
聯芳前良聿紹符竹橫州俗是馴擾遠操孤風寓懷物表

### 韶州公贊

公諱薦睦州第四子貞元十二年侍郎陸贄下明經及第  
初衢州文學守郊社令歷北陽終韶州刺史贊曰鬱鬱北  
螺窸窸澄渚人物一時芝蘭玉樹懿懿韶陽春容矩矱芥  
拾大魁文學掌故載令載刺亨衢傑步沿秩賜緋位隆道  
素

### 通州公贊

公諱曄舊名思睦州第五子奏授滄景司馬賜緋魚袋除  
通州刺史贊曰烈烈通州松栢受命緋衣銀魚穆莊有敬  
爲民作常執維申令由晉入閩纓簪輝映五百逾期于斯  
焉盛胥成而堅旋軫歸慶

### 邵州公贊

公諱蘊字夢復睦州第六子與兄藻歐陽詹讀書泉山貞  
元四年明經及第復舉賢良有天不厭直復生微臣之對  
辟蜀推官劉闢反公切諫闢怒欲殺之公曰危邦不入亂  
邦不居得死爲幸闢陰戒僧人以刀磨其頸脅使屈公叱



見素集卷之三十五  
曰死即死我頸豈爾礪石耶貶攝唐昌尉闕敗還京說滄  
帥程權歸闕除水部員外郎拜邵州刺史知洪州唐書有  
傳贊曰明明我祖精忠卓識結志藏脩奎纏有奕賢良落  
對式是亭直抗義陳詞秋霜杲日載罹虎口刺史攸職幾  
若成仁智不可及傳紀儒林百祀廟食

### 循州公贊

公諱蒙舊名亢睦州第七子奏授孟陵主簿累遷金吾衛  
長史桐州刺史終循州刺史贊曰肅肅諸祖不競不綌勾  
稽匪懈樂是輯柔乃執金吾乃殿循州襲芳序迹良冶作  
求橫行獨步並有九侯東堂陵谷世遠名流

### 雷州公贊

公諱邁舊名粵睦州第八子明經及第初調循州興寧  
縣主簿累遷商州雷州刺史贊曰洵美我公執德弗回席  
麻承祚出穎掄魁與寧伊始嗣有商雷靖恭玄默以封以  
培政是靡忒萃渙激隤波餘後萌遺像興哀

### 福唐公贊

公諱旣睦州第九子睦州夫人鄭氏生端州江陵橫州韶  
州通州朝廷以莫侯陳氏有采繫之德主繼睦州封南安  
縣太君生邵州循州同州最後朱氏生公自號四明處士  
初調京兆參軍春秋博士累遷福唐刺史贊曰衍衍四明



見素集卷之三十五  
續授潛業園其醇源雲居有燁獎恬起落叅軍以徵博士  
嗣遷刺史是承謂難其八又終其九父子弟兄十烈並躋  
虎皮羊質畫脂鏤冰允揚其休式告來仍

福唐尉公贊

公諱攢字會通尊之子睦州之諸孫爲福唐縣尉聞母病  
奔還母沒埏磚甃開坎室有白鳥甘露之祥德宗詔褒嘉  
立雙闕祀鄉賢祠唐書有傳贊曰謝故蘭王玄復其允許  
國諸子夷簡維優憲憲九牧忠則邵州公公從子純孝作  
求荒廬口血木斷山秋白鳥啞啞甘露油油事聞旌命有  
燁斯丘滄桑物改雙闕時留

宗正寺簿公贊

公諱應成字汝大號矩軒宋兩請進士得之公之子嚴重  
平粹時復齋瓜山師事朱文公獨不懼師事二公公師事  
二公師友獨不懼又友其子四如循仰止規約續講東湖  
得文公淵源之懿邃見卓識爲一時道學推宗與子棟同  
登宋咸淳辛未張鎮孫榜進士攝官寧德以理裁事法折  
勢入臺幕獲上信友宋衰以宗正寺簿宣撫司機宜安退  
講道東湖之上一時名士多宗焉贊曰莆興道學艾軒始  
之復齋繼之復齋瓜山偕事文公公事二公獲聞文公咸  
淳之間父子進士不利于施乃見其志東湖講道戢景逃



見素集卷之三十五  
虛一時相推則有四如文公過吾家題曰門對小壺山樓  
接尊經閣四時趣興清萬代詩書樂斷墨猶存相傳公逮  
事焉今考文公卒慶元庚申去公咸淳辛未登第尚六十  
年豈題述在公祖貢元父兩請時耶

### 同安公贊

公諱棟字用可號松湖矩軒公長子父子師事潘瓜山陳  
復齋講道東湖最後公又事黃獨不懼友四如與父同登  
咸淳辛未進士歷知同安縣事有廉直高古之聲慨宋社  
云屋托興迷途尋焦光舊隱之處講明道學以淑諸人文  
公之澤注東湖而演迤以盛公父子達之也贊曰公事陳  
潘又事于黃父子師友金玉其章建水有泚日遠彌長瀟  
之東湖臨視泱泱孰利于涉公也其航載溯之源載漱之  
芳有開道先永裔之慶

### 知州公贊

公字于高號慎齋松湖公仲子俊六世祖也文公講道東  
湖復齋瓜山傳其學公祖若父逮事焉四如與祖續東湖  
之講公偕伯兄教授于野又逮事焉傳介父弟山長子泉  
同知子木父子兄弟四進士退而益脩文公之學型治所  
就世林門文章世林筆位遇雖不逮關西而物品殆類公  
終瑞安州知州事狀遺失所附見與子木並廉名贊曰漢



身素集卷之三十三  
有荀陳宋有胡蔡建陽大成儒宗允賴紫氣停炤脉焉如  
帶孰引而長以瀟以大業維經承巧乃暝會三葉弗辰爰  
有遺愛綠槐誰庭久而未艾星流日翔碑板光怪

同知公贊

公諱以順字子木曲陶郡伯公仲子與伯氏玉井相師友  
以究心艾軒踐履之學續矩軒東湖仰止之傳以至治辛  
酉進士授海寧丞慶元浦江尹台州推官蔡蓬頭寇海上  
主者議招公爭不從棄其官去方國珎之炤遂不可已提  
舉江西時州郡多陷富州已危公署其篆以安旣代州遂  
沒歷福清知州致同知福州總管府事授徒終身公忠誠

不欺方謹奉其職官四十年故居不易一瓦衣麤食糲擇  
口然後言晚望靈光歸然于諸老凋落之後過者考德陳  
有定欲清三路求贊畫于公辭以老以脫興兵禍洪武甲  
寅壽八十一而終祠在鄉賢孫曾起進士爲廣東按察僉  
事卒不能棺世其庶云贊曰衍衍我公聯世其美考亭城  
山重規疊軌果德正行不我有已任獨于同爲什爲起危  
以公存轉足失恃遺直高陽維坊及里清白維遺厥孫是  
似

縣尉公贊

公諱師傳復諱師說學脩字以父慎齋公蔭授將樂尉改



甌寧有平寇功再授仙遊進義副尉以沒鄉人方德至銘其墓曰祿不掩其德位不逮其才意其蘊厥美以昌後來其所以上承于世世者蓋未論也配方公嶠孫女孝而能慈力教子以承公志誌今闕附于譜與方誌者如此贊曰脩以世長用以時誦于後于前于作以述

### 三復公贊

公諱璫又諱圭信玉其字號信齋又號三復學者稱三復先生父諱師說進義副尉公篤自信講學窮理以上續矩軒松湖慎齋子木東湖之傳薦明經爲莆邑訓導轉寧國以教不及績復教莆郡寧國尋有薦者召問知出自公復

教其邑以教諭應脩書召請老得賜冠帶致仕天性孝友元季兵亂活尊幼支門戶時堂從婚嫁而葬其父族七喪妻族四喪脩其祖祠與高曾而下祖墓從父家大疫藥疾殞死無忌畏路遇疾者挈共載或偕舍館而食一布袍四十年歸僅七金妻子每食粥二器乳子婦加半器王學道風爲時推首凡六典文衡所指授狀元環探花賜庶吉士慈郎中孟喬數十名輩皆其弟子有三世門下者慈旣解首問所取浙解陳璉公曰渠密于汝會首果爲璉得部使而下與往來莆者必候問起居以得一文爲重巡視楊侍郎寧隅坐執弟子禮聽講中庸起拜曰某所未聞時年已



望九所求文一夕而就猶燈下細書揚以爲難壽九十祀  
在寧國與郡之鄉賢事具一統閩莆諸志所著三復集幾  
百卷十不存一悲夫贊曰龍起淮甸雲風景從卓彼鴻碩  
爲世儒宗藏聲處下一教始終完中粹行式其章縫維道  
其南維易其東徂徠明復我公是逢

處士公贊

公諱豫字崇德號德齋三復公叔子學于公退而質諸伯  
氏郡博與族人邑博克廣相麗澤以病疴不應辟命三復  
官雖久無力爲遺公偕配方孺人盡易釵珥營斗室薄田  
以奉父母母喪明敕具美食時僅都憲一子方分及之怒

曰吾母日短兒方稚食有時方媿謝喪葬禮盡而哀恒過  
醇靜畏謹處家教子事事循矩度都憲偶觀基斥不容見  
者累日貧而能仁稍餘即及族里鄉以爲鉅人長德郡賓  
必致致必辭事問有質婉有所對一日別邑博聯桂坊宰  
里一少年前揖公問何往詒曰府僉民兵即然亦三復郡  
博固在公茫如也家僅一飾酒器亟取賂免人以為笑抑  
吾家今日亦是基也墓在鳳凰西麓夢所授處贊曰懿懿  
處士守墨含章善用其拙晦焉自藏曰時幽憂方治靡遑  
物戕于明亦刊于方居以弗有言壽厥祥神告吉壤奕葉  
其光



敬齋公贊

公諱宗字存敬號敬齋德齋公子林自矩軒松湖于野慎齋玉井子木三復世以道學名公莊重古意而尤名經學遠邇及門往往策顯仕天官卿尹公旻尤顯者嘗發解首為忌者所落委以命不復試高督學超強之遂捷鄉科魁乙榜授寧海學正改蘄州致揚州教授以養老母以俊貴贈通議大夫都察院右副都御史正身率物督士有常程材成風為之盛蘄祠之學主考山東王察使越尚浮藻公務以理勝榜稱得人親老無它兄弟二子一侍家一侍官率歲終一代其蒞官也寧海之歸無力北上揚歸始葺先

祠故宇量周其三族晚得末疾孝敬不衰日數數省母母間不樂拳跼請過悅然後起祠墓之祭扶拜匍匐淚油油下岳閣老蒙泉為郡守廉其貧助以河南關之地辭助棺酬以直為相壽丘祭之文有未老即歸事育罔遂徵此知學之與潘臬胡公榮程公廷拱守王公弼累請祀鄉賢俊辭起征蜀也督學楊公子器姚公鎮檄郡與黃求我黃未軒宋立齋並祀鄉賢俊又書辭公意也亦矯雜也贊曰于泮之脊于鳳之趾一脉東湖言世孫子經學垂聞猶取淵委師嚴道尊名無虛士維祿逮親厥有繩軌歸罹轍涸言活升水為周為辭義適彼已後償于天考祥視履



菊庄公贊

公號菊庄朝諱以字元旭行教授贈都憲公仲子善誦強記偉特而能厚敬齋宦于外家有方氏大母與伯氏歲一更侍以弗竟垂成之學而責之于子夜分就息鷄再鳴起偕之所讀經書信口導誦不錯一字一句教諸孫亦然手抄時義論策殆千數篇性至孝與黃淑人事方共其常事間出新意以務投所惟方違和衣不解帶者累月事敬齋五鼓具盥櫛諸具導之升堂退復候之門爲解衣帶視膳視文事視藥視寢非事事不離親側執喪盡哀處分遺曲致讓而厚于所後叔氏歲需之繼聯姻族續家譜脩先祠

與瀛州而下十餘墓增其祭田邵州祠力未逮以屬俊創焉青緋三十年再贈右副都御史壽望八以卒五子俊都臺右轄侃郡乘僖州守傳佐以義授階孫十四人達員外郎遇適遴適郡庠生贊曰維性習定粵有源本伊孝伊慈厥類有續蓼莪繫念愍日斯短旣腆旣虔節是涼暖居貞處順厥履坦坦退焉若藏執道日損收之簡穰言告持滿

陳永聲贊

無混而同無獨而異率惟化初守乃先遺逆容順遣羸取儉致進躡徒巧緩行曷躡役四體以長勤領一秋於間龔水雲孤尚道焉隆而與隆墳典故心時乎至而亦至



程